

四庫全書

集部

欽定四庫全書

集部

滴水集卷二

詳校官庶吉士臣吳烜

侍讀臣孫球覆勘

謄錄舉人臣黃道巽

謄錄監生臣單可立

欽定四庫全書

集部三

滴水集十六卷

別集類二 宋

提要

臣等謹案滴水集十六卷宋李復撰復字履中先世家開封祥符以其父官關右遂為長安人登元豐二年進士歷官熙河轉運使終於中大夫集賢殿修撰其事蹟不見於宋史洪邁容齋隨筆載其於蔡京邢恕謀用戰艦

一事上疏排詆甚為切直而恨史之不能詳

盡朱子語錄亦曰閩人李復

案復非閩人此句或傳寫之誤

及識橫渠先生紹聖間為西邊使者博記能

文今信州有滴水集者即其文也其間有論

孟子養氣謂動必由理故仰不愧於天俯不

忤於人無憂無懼其氣豈不充乎舍是則明

有人非幽有鬼責自歉於中氣為之喪矣此

語雖踈却得其大旨近世諸儒之論多似過

高流於老莊而不知不若此說之為得也今觀
是集如謂揚雄不知道謂井田兵制不可遽言
復古皆確然中理其他持論亦皆醇正不止
朱子所稱一條又久居兵間嫻習戎事故所
上奏議大都侃侃建白深中時弊亦不止洪
邁所稱二疏至其考證今古貫穿博洽於易
象算術五行律呂之學無不剖析精微具有
本末尤非空談者所可及在宋儒之中可謂

有用者矣集本四十卷乾道間嘗刻於饒郡
即朱子所謂信州本也後散佚無存談宋文
者多不能舉其名氏今從永樂大典哀輯編
綴釐為一十六卷著之於錄既以發潛德之
光且以補史傳之闕畧焉乾隆四十六年九
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

滴水集卷一

宋 李復 撰

奏疏

論治道

臣聞聖人御天下也必以道而道者南面之術也其所
謂道者豈但漠然而無所事哉其用至微其功至周皆
隱於綱紀法度禮樂德政之間使四海安然而無事至
千萬世而無弊天下由之不知其所以然而然也古之

致治者惟堯能之孔子稱之曰煥乎其有文章乃綱紀
法度禮樂德政之謂也巍乎其有成功乃天下安然無
弊之效也蕩蕩乎民無能名乃不知其所以然而然也
夫惟如是所謂道也後世無可稽焉前世自唐末至五
季天下糜爛大壞有識者傷之至於不忍言國家之藝
祖太宗潛而未躍熟捻昔者禍亂之所由起自膺天命
凡立一法欲絕一壺凡舉一政欲去一弊小大遠近皆
有綱紀法度維持不以喜而妄予不以怒而妄罰使居

官者修其職安其分而不敢妄作不敢苟悅無狂易徼幸之心百姓守其業樂其生無橫擾困苦之患累聖循之迄今一百六十年天下晏然自三代而下未有若本朝平定之久也恭惟陛下即位以來延見臣下必訪治道四方聞之皆曰今唐堯在上矣臣願陛下思祖宗修立綱紀法度維持天下之意不取目前之虛美而求經久之遠慮使上下各安其分守職業具舉朝廷清明民物繁富弊無由而起蠹無從而生天下不知其所以然

豈非配天廣大之業哉治道莫盛於此臣疎遠愚蠢不知治體狂妄獻說惟赦之幸甚

議禮

臣聞聖王治世莫重于禮事不由于禮無巨細皆不可行三代之禮至周而備今考諸載籍所傳者十無二三前世江都開元皆嘗纂綴舊文而行之當時折衷執於古者泥而不通順其時者陋而無法學禮者有所不取後世無可稽焉傳曰治定制禮國朝承平一百六十年

高出唐虞豈三代可擬一代禮典今猶未講至使好禮之士有家自為禮者苟况云禮莫大於聖王是惟聖人乃能制禮惟王者乃能行禮記曰非天子不議禮不制度不考文臣願詔有司上自郊廟社稷下至三祀一祀與夫冠昏喪葬賓軍辨其等威裁其文物不僭不偏據於古而不泥宜於今而不陋著為一代之典其士庶所當行則頒之郡縣使通知焉事有制度燦然可觀四夷百蠻嚮風取則為治世甚盛之舉豈勝幸甚取進止

議樂

臣聞治定制禮功成作樂此王者甚盛之舉天下熙洽人心悅豫發為和聲因其人聲之和而播之八音又形容其成功之象也三王不相沿樂豈苟為異哉治世成功各不同也記曰大樂與天地同和樂豈易知乎三代之樂亡已久矣唐貞觀中命祖孝孫張文收考定雅正粗而未備後累經喪亂其器與書今皆不傳載籍所言雖皆以黃鍾為本上生下生隔八相生及其律管徑寸短長

但糟粕耳有能遺其舊說脫然識其聲別其音者未之聞也夫黃鍾律之始也半之清聲也倍之緩聲也三分其一而損益之此相生之聲也十二變而復黃鍾之總乃旋相為宮之法也萬物動皆有聲若造樂精微之妙凡聞其聲則知是何音合何律是為正音是為變音是為清是為濁如此方為知音可以議樂矣近者陛下有詔選官定樂又博求前代之器夫前代之器各一時之用若得漢唐之器乃漢唐之樂也若得魏晉之器乃魏

晉之樂也但欲求為多見則可矣遽欲用為今日本朝之樂恐未然也晉之荀勗取牛鐸為黃鍾出於獨見果合於古乎樂之作欲動天地感鬼神自漢以還未之聞也朝廷昔嘗定樂矣陛下以為未盡美善亦不能形容祖宗之功業而又本朝運膺火德獨徵音未明此固當重為考定也今聞衆議又只依往昔糟粕而制器此安足以副陛下所降之詔意夫知音者聞之於耳得之於心自不能傳之言遇其應於心方可默契徵音火南方

之音也火性炎上音當象之乃欲就其下而抑之恐非也臣願詔天下廣求天性自能知音者敦遣令赴議樂所多方以試之是誠不謬共為講論庶幾其可矣若徒以舊說尺寸長短廣狹重輕而製器此工匠皆能為之矣何足以為樂乎臣愚見如此惟陛下擇之

論虛名實弊

臣聞古先哲王之舉事也常艱於其始而深慮於其終始雖可為終不可繼則不為蓋慮得其虛名而受其實

弊天下四海雖甚大亦猶庶民之一家以一家之事推之乃天下之事爾臣嘗觀舊史見前世不能深思遠慮輕動生患者其事甚衆不敢遠引以瀆聖聰以臣今親見所謂庶民之家者論之臣居有鄰人承其父業負郭有美田十餘頃衣食富足不能力穡篤治為人所怵喜多田之豪名罄索家資又營遠山之瘠田數十頃欲人稱其田之多也遠田無所得常以負郭資之歲久因遠而因此求虛名而受實弊也陛下承祖宗積累之休無

幽不燭無遠不察其多事輕動以求利者不能昧聖聰
必久已察之矣固不待螻蟻之微獻其愚臣惓惓之誠
更冀終謹之幸甚

論取士

臣恭親神宗皇帝憫士弊於俗學之久慨然作新造之
以經術發明聖人之遺言使講求義理之所歸庶知乎
修身行己上以事君內以事親涖官接物弗畔於道而
今之學者曾不思此平日惟是編類義題傳集海語又

大小經題目有數公試私課久已重疊印行傳寫其義甚多無不誦念公然剽竊以應有司之試終身之學止於如此甚者至於所專之經句讀不知音切不識或誤中選入仕平生所學皆無可用非惟鄉閭無一善可稱雖有甚不齒者亦更不問朝廷建學立師設館給食而偷情苟且若是安能副上教養之意哉欲責其移孝資忠臨民應務之效必不能也古者鄉舉里選非但取其浮文必皆考其素行臣欲乞立法取士以博學行義為

先試言為次抑亦絕其干託奔競之私察其器識材術之異庶幾所養可取所取可用聖朝有得士之實取進止

乞置榷場

臣竊見回紇于闐廬甘等國人嘗賣蕃貨以中國交易為利來稱入貢出熙河路朝廷察知其情故限之以年依到本路先後之次發遣赴闕而來者不已守待發遣有留滯在本路十餘年者其所賣蕃貨散入諸路多是

禁物民間私相交易遠商物貨厚利盡歸於牙僧臣累
次詳問所賣物貨上者有至十餘萬緡下者亦不減五
七萬且遠人懷久客之情平民陷冒禁之法利贏無極
盡歸於牙僧往來無已每遇發遣徒擾州縣今湟州新
復正要措置使商賈奔轅不惟通其有無誠亦厚其根
本之勢臣今欲乞於湟州依雄州火山軍等處例置立
權場於湟州別置蕃市以居來者更不發遣赴闕使利
歸於公貨通於下亦可少補經費取進止

乞置弓箭手堡

臣竊見極邊弓箭手就土山削成峻壁盤開細徑鑿穴以居謂之崖巉凡一巉所聚少者百餘家多至三四百家其情非不樂居城邑就堡郭意務便於耕牧又密邇敵境相與保險以防抄掠之患然本欲防患賊寇若至患不可逃蓋各潛於穴不能相救賊前阨其門尋氣窻灌浸熏燎束手就禍邠者元祐間夏賊寇犯涇原大被其毒邊民皆自知其如此顧戀生業無以為計臣欲乞

下逐路經畧司委官相度就弓箭手耕牧近便處團併指揮建置堡子分擘地步先為土墦漸次修完使之就居備列戰格開掘壕塹修立門橋一堡之內正丁家丁不減二三千人於其暇時教以戰守之法逐指揮人員將校統領分定城上地分每季輪那城寨官前去點檢地分巡檢常切往來照管遇有探報無起遣之擾雖有攻圍必以死守遠近聲勢相接互相應援近年新邊城寨相去近者四五十里緩急卒不相應此壘若成血脉

方通人旅行役不及城寨可就安泊不待官兵戍守而藩籬密完誠一舉而兩利取進止

乞罷造戰車

臣准樞密院劄子奉聖旨令本司製造戰車三百輛專令臣催促製造應副本路出入攻戰使用臣嘗覽載籍古者師行固嘗用車詩云公車千乘公徒三萬又曰元戎十乘以先啟行及周制自步百為畝積而至於通十為成成出革車一乘其他班班亦可見古之用兵與今

不同古者兵不妄動征戰有禮不為詭遇皆有法度多在平原易野故車可以行敵人不敢輕犯此以車為利也今之用兵盡在極邊戎狄乘勢而來雖驚鳥飛翥不如是之迅捷下寨駐軍各以保險為利得其機便或有負敗各逃散不相顧其往車不及期居而保險車不能登歸則敵多襲逐爭先奔趨不暇回顧車安能收非若古昔於中國為用臣在兵馬間親冒矢石前後十餘次觀之屢矣有至糧糗衣服器械不能為用者又況於車

乎聞此議出於許彥圭彥圭因姚麟之子師閔而得見
麟遂獻說於麟懇告求以此為進身之謀麟遂憐而上
其說朝廷以麟邊人必熟於邊事意遂然之不知彥圭
劇為輕妄麟立私恩不思誤朝廷之事是亦容易昔唐
之房琯嘗用車戰大敗於陳濤斜十萬義軍無有脫者
當時止在畿邑平地且如此況今欲用於峻坂溝谷之
間乎又戰車比常車濶六七寸運不合輶牽拽不行今
配買木植物料差顧工匠大為費擾既成艱於牽拽昨

東來者牽拽不行致兵夫典賣衣物自賃牛具終日方進五七里遂致兵夫逃亡戰車棄於道路大為諸路之患其糜費不知其幾千萬矣苟望一官之進上罔朝廷下害百姓此而不誅何以懲後臣今乞便行罷造如別路已有造者乞不牽拽前來免致徒費人力如朝廷未以臣言為然乞賜博訪謹具奏聞伏候勅旨

乞罷造船

臣准尚書省劄子涇原路經畧安撫使邢恕奏乞下熙

河路轉運司打造三百料及五百料船五百隻將造成
船於黃河順流放下至會州西小河內藏放奉聖旨專
委臣監督催促打造限一年了當臣竊知邢恕欲用此
船載兵順流而下去取興州契勘本路見有船匠一人
須乞於荆湖南北江淮兩浙剡刷和顧又釘線物料並
非本路所出昨造蘭州浮橋皆自別路應副非惟工匠
物料全無臣觀邢恕奏請不止於道聽塗說亦實是兒
戲且造船五百隻若目今工匠物料並備亦須數年其

聲勢夏國必已詳知自蘭州駕放至會州約三百里北岸是敵境豈可容易會州之西小河鹹水其濶不及一丈深止於一二尺豈能藏船黃河過會州入常精山石峽險窄自上垂流直下高數十尺船豈可過若只是棧木經此亦須撲散然間有浮者船既破散一沉無有却浮過此峻流至西安州之東大河分為六七道散流謂之南山逆流數十里方再合逆流水淺灘磧不勝舟載設若可行自會州之東便是生界兩岸皆是敵境一船

所載不過五馬二十人五百船共該馬二千五百匹一
萬人兼糧糗草料器械衣物盡在舟中縱使在河不為
敵人所取雖到興州又何能為又不知幾月得至此聲
若出必為夏國侮笑豈止謂秦無人矣臣今未敢便依
指揮擘畫乞差刷工匠應副物料伏乞再下邢恕令詳
具如何措置的有萬全之策朝廷詳酌實見可行再降
聖旨造亦未晚臣愚見恐虛費錢物終誤大事不敢緘
默須至奏聞伏候勅旨

守坐臺鋪議

臣昨見沿邊守坐烽臺口鋪最是重難自來本地方城寨分擘守坐之人不限戍兵蕃兵一例輪差東來戍兵不能辛苦多是不着臺鋪蕃兵又難以盡依官軍驅使地方官雖時或點檢終不整齊若有緩急竊恐誤事欲乞沿邊烽臺只差土兵與側近弓箭手其口鋪如土兵弓箭手人數不足方許兼差蕃兵亦不得只差蕃兵如此則烽燧巡防不致誤事伏候聖旨

乞於阿密鄂特置烽臺

臣近巡歷自蘭州京玉關至通湟寨入湟州路經巴咱爾宗其路極深峻窄險滑濶不及二尺陡臨宗河般販斛斗客旅畏其難行頭畜脚乘盡由宗河北路過往北路是夏國生界三處有賊馬來路又近夏國幹鞏城溝谷屈曲賊馬隱伏不測出入抄掠前後被患已十餘次緣客旅往來通湟寨京玉關四十餘里中途倉皇南北奔趨不及遂被殺虜今京玉關東北約二十里有舊阿密

鄂特城地基正在兩城中路地勢甚高接連生界欲乞
下本路經畧司就彼修築烽臺比尋常增展寬大可以
停泊五十人開掘壕塹築立羊馬牆安置門橋備設守
禦之具差人守坐照管賊馬出入若有抄掠客旅可以
奔投若賊馬數多舉烽火京玉通湟頃刻便到蘭湟二
州兵馬相接而至不須更築城寨足可隄備伏乞詳酌
施行

小貼子

今烽臺守坐并軍員只是六人若修置如法
有矢石守禦之具非一二百人未敢輕犯又

應接甚近夏國安肯以六人易一二百人
之命須合修築今併畫圖進呈崇寧三年某月日狀

乞與孫路贈官及例外推恩狀

右臣某按路治平初以進士擢第歷官中外四十餘年
遠職守義昔通判河州承景思立敗衄之後綏輯蕃漢
人情懷附後通判蘭州夏賊攻圍抗賊堅守終能保完
城壘紹聖間為環慶經畧使進築橫山興平寨闢土廣
屯皆據要害又招納到強酋李阿雅卜詢考敵情皆得要
領元符初移帥熙河築會州等城直通涇原前後措置

實而不華不敢虛飾以為身利又能愛惜民力臣近以朝廷講究邊事如路鮮有及者曾具論奏今被詔旨赴闕奏事路雖已得病以久懷邊事本末乃欲力疾造朝一陳所蘊期有補於朝廷西洛士夫皆深歎仰不幸瞑目齋志歸於泉下平生清白自持家貧子幼衆共傷惻伏望朝廷優推贈典例外官一子或孫特給賻卹候將來舉葬令所在州縣量行應副庶使天下知朝廷不忘有功以為來者之勸謹錄奏聞伏候勅旨

相度河北西山水利害申尚書省狀

右某准河東路轉運司牒坐准尚書省劄子檢會相度河北河事張商英奏河北西山諸水今為水患衆河之水出自河東乞令差都轉運司官前來河北同共相度某准本司牒差委前去今按行檢視得河東自大河之東諸水會為三川自寧化軍過入太原并汾石晉絳皆會於汾汾河南流直出河中府界之北遂入黃河忻代之間及平定軍北山之水皆會於滹沱河滹沱河東流

出於真定府南趙州之北澤潞遼州威勝軍之水皆會
於漳河東出相州界滹沱與漳皆入黃河今河北近西
山之水非止滹沱與漳亦有他水西入於大河大河翻
沙滾流沙漲時每淤塞水口水遂漫流逐處地分不肯
開淤塞之處並恐渲刷侵損堤堰此事其來已久河東
地居山上河北地居山下地勢高低不可以丈尺計其
水東走甚於建瓴若不放入大河令歸何處豈可截回
而西萬無是理雖源出於此流必歸彼自禹之開導至

於今日不可改也某今已親到河北詳說與相度河事
張商英等更無別理謹具狀申尚書省

乞開黃河中灘

臣某蒙恩差知鄭州於今月初四日到任首見差發人
夫急於星火知大河漲溢原武等埽危急緊要修疊固
護臣久知原武一帶堤埽比諸處不同為鄭北盡是積
水陂湖相連直接國門又地勢高於京師若有決溢勢
迅東下臣遂親至河上體度水勢次第今見大河於原

武東二里以來中心有灘一道長三里餘濶一百餘步其灘已老問人云已十餘年沙土堅壯河漲為灘所激奔射南岸水勢甚緊枝梧費力臣現多方措置兩月稍見次第然今年補貼雖得稍定來年遇漲還作上軫宸慮下勞百姓臣今乞下都水監將中灘於心中東西開透令引放河身於河漕中心通流雖有暴水不偏着岸更無危急兼東西只是長三里有餘用工不多可絕後患今并畫到圖子隨狀進呈伏候勅旨

河東鹽法議

某准河東路轉運司牒准尚書省劄子令某賁本路鹽法文字赴都堂稟議竊惟河東永利兩監及馬城池鹽利害甚不難見其往昔措置不須詳說據目今只有三說一者官自賣一者只令客販一者官賣及客販兼行某熟曾講究若只官賣如昔年盡是抑配又有般運強差脚乘之擾若只令客販客旅不來算請招誘不行無可秤提兼慮侵奪若二者兼行互相爭侵客販難久某

曾總計三處鹽課一歲所得僅一十萬貫其中官本三萬餘貫又鐙戶中鹽入官額及八分免放戶下助軍糧草七分更不支移一歲免放亦不下五六千石即所得鹽息粗及三萬貫而歲賣及額息止如此而亦常不及額張官置吏祿廩幾何又追呼催督公吏騷擾捕捉私販禁勘連逮畧無虛日此不足以當一郡酒稅之入而為河東二十餘州之患其得甚微其弊甚大又安足議况馬城池鹽尤更不堪無人算買今已七年支啗駝畜

餘皆棄去乃昔日將解鹽冒進欺罔得賞本路晉絳慈
隰已是解鹽地分乞將本路盡行解鹽給降解鹽文鈔
三十萬席付本司依陝西例分擘與沿邊州軍許客人
用見錢請買或入中斛斗算請般販解鹽前來聽其自
便將兩監及馬城池鹹地盡令開耕嚴禁私煎立定日
限令巡尉躬親徧行點檢如私販於他處販獲並連私
煎及巡捕透漏皆坐罪庶稍寬一方之刑禁一路上下
皆食好鹽自來陝西鹽鈔立限七年今本路鹽鈔乞以

十年為限以事初客知寬限易為招誘兼其間雨多之
歲種鹽數少支遣有闕限寬可以等候本路近北州軍
比之解州東池往陝西沿邊地里猶近委是可行伏乞
詳酌施行

欽定四庫全書

滴水集卷二

宋 李復 撰

表

賀安九鼎表

雲物應符兆啟昆吾之瑞琳宮考古慶成邾鄆之安賀中
竊以軒轅開祥廣發三才之象夏禹圖物畢朝九牧之
金而皆嚴役陰陽之神煥成天地之寶道異升降勢隨
重輕周器已空遂起楚人之問漢巫語怪漫迎汾水之

祠曠歷世而莫傳俟聖時而有作恭惟皇帝陛下睿謀
廣大盛德休明俯收遺逸之言高舉泯絕之典山林四
裔知永息其陰姦宗祏萬年見顯儲其神策臣謬持使
節密邇畿封盛事惟新激昂茲始

謝復任表

叨承芝檢再直河圖隕命自天措躬無地中謝伏念臣機靈
勿爽器質匪奇早誤使令永甘沈廢豈意寒微之末預沾
甄敘之私見齒清時蒙還舊物十年屏迹形彫墜谷之憂

一日拜恩涕發戴盆之照危心易感禱魄初歸此蓋伏遇皇帝陛下好惡無私德刑並用麗日正午物無邪陰震雷發春蟲無蟄戶煥青宮之縟典光動前星削丹筆之刑書澤均園土睿斷獨高於往古普天盡屬乎完人叶氣旁流羣生共慶熙朝接武徒結想於清途間廩庀身悵難圖於微效

賀幸太學辟廋表

玉蹕和鸞肅奉六龍之御壁流黌舍親紆萬乘之尊輿誦載傳羣情均慶中賀竊以晉武視學惟行飲酒之儀漢

明臨靡但講拜老之禮豈如聖世翕變道真發秘化以
開人之文敘彝倫以建民之極膠庠奕奕美輪奐於綿
區絃誦洋洋揭聲明於寰海恭惟皇帝陛下道致廣大
性熙光明放異路之滛辭興千年之絕學海涵地產生
共慶於時升雷動風行物咸新於聖作顯嚴法駕賁煥
儒宮示淵衷勸獎之心昭熙朝華綽之典臣適分符竹
阻詣闕庭臣無任

賀皇太子登寶位表

臣某言伏覩去年十二月二十四日手詔皇太子即皇
帝位者分茅建國昔開王者之封飛龍御天今應聖人
之造德音誕布海寓均歡中伏以明兩作離光繼四方
之照帝出乎震德孚萬物之情席祖宗不拔之基擁社
稷無疆之祉恭惟皇帝陛下溫文孝友恭儉慈仁允協
昌辰遂登大寶海涵地產咸忻日月之新川泳雲飛永
賴乾坤之慶臣久棲田畝常苦疴瘍望九天而馳心同
百獸而率舞臣無任

賀南郊表

迎陽候景循三歲之彝經尊祖事天擁萬靈之殊祉恩
覃動植慶浹華夷賀中恭惟皇帝陛下德大嚴親禮隆重
祭燔柴奠璧昭精意於靈承灌鬯加遽享孝思於配侑
瑞霄溢彩澄海浮光風動雞星燦祥輝於雲表日開園
土騰協氣於民區凡在萌生率同茂遂臣獲頌明詔幸
觀昌辰聳踊欣歡恭伸頌禱

賀元會表

龍德御春舉外朝之盛禮天心儲祉罄率土之歡心賀中
恭惟皇帝陛下肅奉瑤圖紹隆寶祚正萬物生成之始
擁上靈保佑之休茂對昌辰聿修緝典臣竊司外計阻
拜前墀西駕飛輶日切雲天之想東傾丹闕阻陪駕驚
之趨臣無任

賀五星循軌表

聖德顯孚默動九天之鑒星躔高應燦流五緯之祥觀
象告休馳聲交抃賀中恭惟皇帝陛下政修六府道格三

辰販乏養疴時錫萬方之壽育萌撫乳世無一物之疵
薰然叶氣之和感彼層霄之瑞連珠騰彩順行黃道之
經披錄考占永契豐年之兆嘉驗清臺之奏光垂信史
之書臣向闕傾風共仰一人之慶佩符起舞均同四海
之歡臣無任

賀破蕃賊表

蕞然醜類已大殄於龍城肅爾王師遂再臨於鄯壘復
收故境懔赫嚴威中竊惟氏疆昔皆禹履汙隆有異感

關隨生未請終軍之纓莫斷匈奴之臂天寶道喪肆猖
獷以東侵熙寧真興屢憂勤而西顧未航河葦忽墜烏
弓比雖暫得而未完遽自速顛而還失孝思善繼舊壤
咸歸恭惟皇帝陛下默運神機妙敷聖畧勝決九重之
上功無一鏃之遺山川開日月之新邊徼淨烟霾之翳
青海薦祉願呈天馬之歌積石窮源將見仙槎之使臣
叨司外計方備戎行阻稱萬壽之觴竊忝千齡之運臣
無任

謝直秘閣表

彤庭入對，承三接之恩。芸閣升華，叨奉十行之詔。循

墻莫避，據彝增憂。

謝中

竊以金馬石渠，內闢藏書之府。蓬

萊方丈，天開羣玉之山。育材喜詠於陵，阿垂象耀文於

奎壁。世高華貫，時謂要途。宜求特異之才，可副最優之

選。如臣者，流離弱質，樸樸瑣瑣，材行未免於鄉人。心漫期

於絕學，徒緣貪食，偶綴辭科，困簿領之塵迷，已餘半世。

思簡編之舊習，恍若前生。論文未及於窺斑，奏賦無疑。

於覆甑自慙荒落有玷寵靈此蓋伏遇皇帝陛下德照容
光道成善貸鳶飛魚躍樂聖造於天淵雨潤雲蒸鼓和
風於草木欲增華於遠使故曲示於鴻私顧臣何堪被
遇若此臣敢不敬思可欲無徒事於浮文力行所知庶
勉圖於遠業仰酬覆幬以盡麋捐

謝賞功表

猥被芝書進直龍馬超兩官而躡等叢小已以增榮拜
命雖優俯躬彌厲中謝竊以奮揚湯武恢復堯封集齊五

路之師進冒三峽之險移金轉餉敢言一道之貧獻力
鳩工寧憚六州之寡漫歷半歲徒憚百為事切應期罔
暇資於旁助功須核實豈容飾以虛辭第恐有玷於使
令敢意苟逃於誅責得從善貸已荷寬恩遽冒殊私皆
非素望此蓋伏遇皇帝陛下德涵博厚明照幽微審知
師旅之興無若芻糧之急累嚴聖訓慮乏軍須謂其闕
事而有誅因其成功而亦錄豈謂九天之邈能矜一介
之微臣敢不恪勵官規益修職業勉竭涓埃之効上酬

覆幬之恩臣無任

謝冀州到任表

叨承恩詔游易州符祗荷寵靈但深兢懼謝伏念臣材
惟樗散識甚麤癡務堅義守以持身敢有剝心而擇事
初畢西寧之役亟當東里之衝夙夜靡皇事為粗舉賜
汲黯之故綬將若深鷁御列寇之冷風遽隨退鵠屢被
長民之寄第增竊食之羞此蓋伏遇皇帝陛下聖度包
荒仁心博愛明容光而必照道善貸而且成兩河為州

濫庇信都之益九曲到海當窮積石之源顧慙一介之
微曷報兩儀之施臣無任

謝夔州到任表

比嘗塵疏願終毫社之仙祠今忽拜恩俾載寧江之侯
旆仰虔嚴命俯激懦衷謝中伏念臣淺甚蹄涔利非囊穎

每自恃其愚直故動忤於貴權敢萌怨尤分甘流落知
公議之有在荷聖朝之不遺滅竈更炊雖尚梁鴻之慷慨
敝衣白髮久嗟顏駟之摧頽而况控三峽之要津連

五溪之絕徼初崇體勢分鈐東道之兵屯沅責規模講
究新疆之邊事茲非衰朽可副選掄此蓋伏遇皇帝陛
下體乾好生法坤博載察臣志不圖於妄動知臣利匪
在於苟求始甚迂踈後皆久遠不雷同於輕舉使安靖
而少康益堅素心仰遵明詔臣無任

謝賜茶藥表

寶奩緹襲瑞璽泥封恩降慶霄光生蔀屋

中謝

伏念臣素

慙譴薄叨預使令飛輓徒勤尚闕關中之粟幹旋雖力

未流地上之泉漫殫夙夜之勞蔑有涓塵之效豈期眷
錄遠逮寒微此蓋伏遇皇帝陛下盛德兼容深仁無間
示記存之必洽俾感悅以忘勞碧月紫烟起清風於兩
腋丹芝玉粒動五色於西山誓竭微軀仰酬洪造臣無
任

謝熙河路轉運使到任表

書林進直濫遊奎壁之躔邊計分疆謬領岷洮之節揆
能曷稱循分難安中謝伏念臣賦性惟愚受材非敏自元

豐西夏之問罪迄元符隴右之納降効官九被於終更
歷歲八逢於餘閏屢馳沙漠久應羽書備嘗險阻之艱
敢意功名之會心安義守人歎數奇已蹭蹬於半生甘
低徊於末路忽承嚴召入對清光動玉色以周詢霽天
威而清問握蘭鳴佩初陪錦帳之班攬轡登車遽被繡
衣之選惟河湟之襟帶乃秦蜀之藩維開擴雖新輯寧
匪易用無素備利乏長源將論經久之遠圖先有倉猝
之急務事機紛錯聖訓丁寧再惟責重而身微第覺寵

深而能薄此蓋伏遇皇帝陛下德以立武功能繼文高居
九重之深周知四海之遠方闢國以經畫特置官以講
求無責備於一夫期有得於千慮而臣誤蒙寵假罔敢
辭難輦鼓尚嚴憂在冕旒之西顧雲天初遠心如葵藿
之東傾誓殫犬馬之勞仰答乾坤之造臣無任

謝京西轉運副使到任表

朔部分符中玷兩河之邑豫疆持節東依千里之畿仰
荷休光退增危懼

謝中伏念臣才非濟用識昧通方轉守

三州愧鉛刀之何利總輸兩路嗟駑駕之徒勤而況急
應河流之防虞崇陵寢之奉園府修政方鼓鐵以流泉
本支疏恩初營居而頒祿盡承明詔俯委懦躬自省庸
虛曷稱掄選茲蓋伏遇皇帝陛下湯仁務簡舜德用中
審知世患於才難固責人周於器使棖櫨並用輪桶同
施千金受封術固慙於絢紉五管賜粟功可笑於支離
臣敢不勵勉初心力圖遠業誓畢期於糜殞庶上答於
生成臣無任

代人京兆謝上表

錦書錫命賜特出於中宸符竹分邦易再臨於舊治拜

恩優渥跼蹐凌兢

中謝

伏念臣稟質蠢冥賦分竒蹇沉舟

已棄但興駭浪之悲戴盆至幽忽被容光之照起於久

廢付以中權問罪興師上仰承於睿算殲渠執馘俯粗

震於天威迺荷寵光曲垂慰獎至於前後之奏請盡畧

狂愚而憫從遐瞻天上九重之深豈啻堂下千里之遠

孤悰難悉聖念皆周素無強援之先容咸自淵衷之垂

察危心易感極涕橫流此蓋伏遇皇帝陛下智燭幽微
仁均覆載日月垂耀凡卑高曲直不能隱其情天地滋
生故草木昆蟲皆得遂其性致茲寒陋獲玷甄收解國
水之師屯委秦關之藩服屢懷故綬薦殿名城自省遭
逢惟慙忝冒臣方力圖涓末期寬宵旰之憂遙睇雲天
徒結痲勞之思臣無任

啟

賀韓相太原禮上啟

眷寵中宸撫臨全晉涓辰開府庶類均歡伏惟判府經
畧太尉相公鉅德邁時沉幾先物威聲震於憬俗術業
映於清時樞極深嚴肅本兵而畏厲台階緝穆耀元化
之丹青一德顯乎千齡合契茂桐陰而垂蔭秀棣萼以
連輝偉然家世之異倫卓爾衣冠之盛事三朝舊老四
海具瞻授鉞晉邦開四封而受祉擁旄參野護諸將以
宣威側聞載頌之音已布維新之政兵民輯睦羌虜救
寧顯惟當世之賢隱若長城之勢某方拘賤役阻造慶

班下情不任

問候集賢相公啟

伏以公府深嚴徒仰熒煌之座庶僚賤冗敢塵咫尺之
書宣化育之至仁奉清閒之密燕天佑一德體膺百祥
恭惟集賢相公元精所生大節不奪安國家而隆禮衛
社稷以履忠功高三朝望重四海周勃在漢莊厚而可
憑如晦於唐斷裁而弗滯有生蒙德無物失宜載惟孤
蹤久荷洪庇阻與黃閣之拜冀精素履之頤瞻望台閣

下情無任禱頌依歸之至謹具狀上問鈞候

賀蘇中丞啟

伏審光膺殊命榮總中司聞輿論之僉諧知聖朝之遴
簡恭惟御史中丞早摠遠業妙發賢科方觀擊水之鵬
忽歎遡風之鴈江湖流落澹與世而相忘金石堅完第
秉心而弗易鳳衰歲久豹變時來果承簡拔之恩登踐
紀綱之地獻可替否凜然正議之歸吐柔茹剛肅爾羣
邪之伏某徒勞朱墨遐睎雲天空馳賀厦之誠莫遂登

門之慶

賀許左丞啟

伏審眷倚中宸寵登左轄側聞謦命實并輿情恭惟左
丞識際高明德涵純茂發閩山之秀氣奏第無前鼓鼇
禁之英風擢辭獨出早膺睿簡寵與政機初抗論於明
庭旋均勞於巨屏澹無喜愠安處險夷雖入總於中銓
猶久傾於羣望爰感風雲之會再依日月之光色動天
文燦旁輝於軫翼味調鼎實將有待於鹽梅某久遠台

閔方縻塵役遐聽芝函之異阻陪龍坂之趨茂悅之誠
沛集於此

賀蔡右丞啟

伏審榮膺顯冊進轄中臺除目遠騰歡聲遐溢恭惟右
丞德涵健順學造本原夙推望實之隆密奉聖神之眷
日月無幾清華徧居二耀垂光煥西崑之文采五羊流
化靜南海之風波出偃要藩入虛前席比寵承於龍綽
爰峻陟於鑾坡雖炳蔚於帝文猶紆抑於人望果膺睿

簡入贊政機隆棟凌雲已壯巖廊之勢和羹有味將調
羹鼎之珍某久遠高風謬榮末役僭馳誠於廣厦期委
質於洪鈞抃臆實深抽毫奚既

賀韓侍中知長安啟

伏審精差穀旦大鎮雄藩視政云初嚮風竊抃恭以慶
慰伏惟判府經畧司徒侍中德為巨老氣稟元英輻輳
智畧於上前身繫安危於天下三朝忠蓋萬國儀刑帝
思秦雍之區疆控夏开之要兵須節制衆賴撫寧非宰

輔之自行慮宸憂之未釋竚清邊瑣歸總台司某職繫
統臨地雷履瞻望旌榮下情欣抃激切之至

回潁州林內翰啟

日新堯厯爰開四序之初時告夏正肇發三陽之始伏
惟知府內翰久懷妙畫密簡淵衷紫禁晝閒動雅情於
紅藻鑒坡夜直驚異眷於金蓮比承將命之榮暫有分
符之秩顯膺華旦茂擁殊祥顧慶禮之未修辱貽音之
遠賜內猶簡緩仰服謙光第頌德以采勤豈抽毫之能

既

回提刑賀冬啟

新陽應律長景生圭進堯歷之初躔講漢庭之亞會恭
以提刑戶部高文華國妙畧映時周通枉滯之情雅有
澄清之志履茲吉日俞受純禧願奏牘之未遑辱占辭
之遠及重慙不敏但服殊私方專奉詔之趨阻奉稱觴
之慶其如傾頌罔究敷宣

回潁昌林待制賀冬啟

氣應發潛靜以待陰陽之定卦推歸本復其見天地之
心恭以知府安撫待制盛德顯乎美材卓軼顯印法從
早登延閣之華偃息藩垣寵有介圭之錫茂乘慶旦允
集繁禧遠承一介之馳先枉五雲之翰愧慙禱頌百倍
常情

回吳常平謝到任啟

寵被恩書肅持使節涓辰任事嚮聽增愉竊惟常平立
法之初實出周恤哀民之意高貲有術務厚息以侵漁

重沒無端致波產而困弊務權柄歸於公上俾斂散付
之有司審其變通為之改作後多觀望無異兼并皆謀
踈進而踈成惟欲多散而多利強為抑配暴肆催驅孰
躬美政之原第習近身之計伏惟提舉朝奉處心必厚
愛物無私周知善惡之由能布朝廷之美俾民無憾與
時維新已欣聖德之可傳更荷柔風之遠及其如拊對
茂章予懷

欽定四庫全書

集部

滴水集卷三

四

詳校官庶吉士臣吳烜

侍讀臣孫球覆勘

謄錄監生臣黃琮

謄錄貢生臣章松雲

欽定四庫全書

潘水集卷三

宋 李復 撰

書牘

上章丞相言邊事書

復頓首再拜復愚疎無識然屢陳鄙見仰荷鈞造不惟
不罪狂妄亦蒙採納感服無已諒惟高明知其盡心於
門下然爾復近見尚書省樞院劄子下經略司皆立畫
一措置邊事經畧司一一遵依施行復竊深思有未然

者如朝廷必欲歸於上令邊臣一聽指揮則可矣然於邊情事機恐難悉盡蓋乘機應變間不容髮事有萬端而決策於廟堂之上定計於千里之外苟違令則廢命從令則或有不可廢命則後來之命雖嚴人敢故違從其不可則目前之敗莫救蓋傳聞與親見遠度與臨機有異廢命則肆情玩法之弊起失事則邊情遂搖雖亦行罰人亦不服今之獻策者甚多可取者百無一二皆謀身之計多徵引舊事如漢文帝時匈奴大入蕭關今夏

賊所用之兵及首領與夫犯邊之策盡如漢文時匈奴
事體否此皆空言而不可用也且今經畧司遣統領官
出塞亦姑授其大畧洎出塞凡百盡在統領官矣其密
邇尚且如此况又其遠者乎若只責其無敗事使在外
不能窺測朝廷之意邊臣上下不敢苟簡亦不敢便安
自營如此則在上者簡而有要朝廷之體益重複贅謬
不識事機惟相公裁擇復頓首再拜

上戶部范侍郎書

某頓首再拜戶部侍郎春氣暄和伏惟尊候萬福前者人還蒙賜教答上荷謙眷不勝感戴某昨承問役法今具管見布聽近降指揮役事令安撫司與漕憲同議但不無觀望故未知利害之情實向日田役稅出亦畧循唐楊炎兩稅之法今之役錢乃向之差役舊稅沿納錢內有鹽鞋麻布牛皮等錢十餘色昨因方田盡隱其名並只稱雜錢今麴引別行出賣牛死納官昔時計口受鹽春中俵散至夏隨稅納錢近日穆衍奏請更不俵鹽

乾令納錢又啓此無名之源非惟無名而又隨稅支移折變抑又甚矣民丁已充保甲更要差役一戶兩丁盡應官事恐亦難行若論丁口人數則有保甲正丁餘丁簿照會若家業等第自行免役後來非如向日的實今若重別檢校升降必須大擾終不能盡又一縣之間三等已上戶有差役不及兩番者州郡衙前不以管下縣之戶口多寡等第高下分差因此遂及下戶下戶與上戶均承重役安能久行似此非一監司怙勢抑令州縣

奉行偏見是致紛紛久未能定緣一路於天下一州一縣事體各有不同廟堂之上不能周見苟遽欲改更決有窒礙莫須熟講非立談可判也畧此不及詳細幸恕察

又上章丞相書

某頓首再拜僕射門下相公春氣漸暄即日伏惟機政清暇台候動止萬福青唐事已白張漕一一上覆緣轄沁本婁齊勒部族董戩取其母收而嬖之轄沁隨母入

董戡家董戡久病不能出入與諸首領不相見凡措置
國事傳遞語言皆命轄沁與之久而轄沁擅權因董戡
死果莊助而立之非誠使之立也姑立有待而篡爾果
莊死無助國人陰有欲逐之意轄沁微知之每朝廷遣
使至青唐大夸於其國以謂有朝廷之助自前歲以來
專寵夏國僞公主從其所好修寺造塔科配國中出金
國人大怨今結幹綽克乃果莊之子星摩沁戡乃董戡在
日用事之人各有篡心各欲因國人怨而起事但兩酋

未敢先動轄沁已不能立欲與其黨盡出歸漢近兩遣
酋首嘉木燦及且依結將蕃字來要兵馬迎接前月經畧
司遣蕃僧往青唐及喬家族上下體訪事實昨日回方
言結幹緯克星摩沁戡各聚集部族今却不敢作事已
同遣兵馬往上喬家族喚溪巴烏緣溪巴烏是董戡堂
弟青唐人須是貴種立作王子方肯信服今聞溪巴烏
不肯來爲溪巴烏長子布贊已被果莊欲立轄沁時殺
之有布贊弟隆贊年十八九歲却肯來未見起發時日

今國中既別立王子即轄沁畏禍并其黨首領決然出漢不敢去投夏國爲舊日累曾與夏國讐賽此事甚的昨准朝旨措置招納及須要收復青唐近者經畧司已具畫一奏請但轄沁既來待之須優首領高下須有等級其餘部族未給田之際或無田可給並要日支口食此甚有所費又彼人初到青唐未能主事首領心不齊一乘機取之甚易只是既取事初須得重兵鎮守聞青唐苦無糧儲道路艱澀難於般運自河州至邈川四程

邈川至青唐約四程過三隘路此最可慮蓋守地必以城守城必以兵聚兵必以錢糧一日無糧城不能守也仍更慮別有緩急凡此相公皆必已熟計之矣其餘事之節目備於奏狀及張漕書中某續亦別具拜覆次不宣某頓首再拜

又上章丞相書

某頓首上啓某蒙賜台問前日不取幹珠爾城事機的是如何本路昨自七月初四日後來探報得夏國大段點

集人馬又每日得涇原關報夏賊決來侵犯平夏城一帶及稱國母夏國主兩人自統領傾國人馬前來又稱前後諸處探報並同請依朝旨出兵牽制及准尚書省樞密院劄子並坐涇原所奏令本路出兵牽制及指揮令破蕩西涼府已來一帶部族家計不得徒爲文具本路經畧司率總管王愍統領雷秀王瞻李澄康謂及諸將人馬并將帶日近招到夏國僞御史中丞屈成及屈成親舅前去緣屈成是夏國右廂統軍星多貝中親姪

貝中部族並在西涼府一帶左右其西涼人馬見攻圍平夏城故使屈成爲之鄉導某當時親在軍中既統領人馬過河以大軍前去恐幹珠爾城乘虛出兵却來侵犯西關及金城關遂令康謂分帶軍兵四千餘人往幹珠爾城作攻城次第牽制賊計有王贍李澄纔入蕃界見蕃騎三十餘人只要取此遊騎不肯前來王贍本邊人弓箭手之子妄作士人舉止李澄乃賊李三李定之子並無所能王愍遂留此兩人及量留步人只令在濟沙谷

內盤泊與雷秀統領其餘諸將入馬過實勒頗卜朗往西北過雪山及炳靈寺又西北令雷秀分統人馬兩路入却會各有斬獲到彼見山上火起問之已報軍前次第右廂人馬一兩日却回來乃收聚兵將却歸遂解涇原之圍及遣騎至報康謂令歸自來體問得幹珠爾城中守禦常有千人已上器械防城之具甚備城壁堅完非五萬人已上未可輕攻緣攻城須作番次又須別整齊軍馬隄備外援俟城上矢石欲盡方能併力下手今量

分四千餘人並不曾畧施攻具豈有得城之理王愍前去四日三夜雪中往來走七八百里斬獲二千八百餘級驅畧到生口八百餘人內有夏國僞公主及近上首領王膽以已不敢去恐王愍申舉又妬王愍成功妄有媒孽某體訪前後諸路出師牽制只是纔出漢界一二十里盤泊却歸未有似今日實爲鄰路解圍獲功如此王愍忠勇老練雷秀遇敵果敢本路諸將皆無及者此相公必素知之今蒙垂問不敢不具實拜覆伏乞詳察

某頓首上啟

與張橫渠書

某蒙誨諭宗子之法若以差等言之則自天子下至公卿大夫士庶人其法各不同每遷之遠必須有異諸侯每一君各爲一大宗而小宗又應不一五世之間其衆亦滋而同繼其祖同繼其祖則同謂之繼曾祖同繼曾祖之小宗而於大宗如何而公子之宗至於親盡則各立其宗若大宗中絕則當誰繼以春秋考之魯之考公

煬公幽公魏公獻公武公孝公皆弟也不可以爲宗子之法又傳云同姓從宗子之族屬其法亦不見今若爲之說恐非周禮此制久廢若得其說禮可行也

回歐陽學士書

某蒙問煙波子往年於長安雷氏曾見圖象亦於小說中見名志和字子同張其姓也常漁於洞庭顏魯公在吳興愛其高逸以漁歌五首贈之志和乃摘句配景自畫成幅人禽草木風雨煙雲雅盡其妙後人多模倣而

傳之今所示畫得非祖述否近世有傳漁父詞此音舊矣恐非始於煙波子不審於他書中曾見否

與李學士昭玘書

某承諭顏魯公墓碑某昔閱舊史唐德宗興元元年八月三日李希烈使闖奴與賊將辛景臻縊魯公其年五月李晟已收復京師六月幽州軍士韓旻斬朱泚於彭原興元二年改貞元貞元二年李希烈爲牙將陳仙奇所醜并誅其妻子以淮南歸順乃護送魯公喪歸葬

京師其忠烈如此當時喪葬必不草草但舊史不書不知其爲立碑也長安洛陽圖志昨赴官不曾帶行未得討閱向有小說言魯公葬後其家僕遇之於洛水北狀貌如平生付白金令濟其家記之不詳俟再尋閱也

答李忱承議書

某再拜逋中遠蒙貺伏審燕居超逸體履增勝無任感慰之深承聞恬養自得不廢著述益知賢者之樂異於衆人仰服無已辱諭修地理書此某素志願爲之久矣

然累思之此非私居位下者所能集前世作者其紀類
條目在天必考星辰所臨以別野在地則以禹貢所分
以定區域其間郡邑山川物產風俗與夫故事遺迹舊
書所載無不闕畧亦多訛謬蓋有得於傳聞或田夫野
老之語或好怪誕僻之言無所證據本末又多不完且
如盛弘之荊州記晉太康記虞喜地林三輔決錄鄴中
記辛氏三秦記括地志寰宇記述征記水經似此等書
不啻百餘家苟盡能得之廣聚其言博爲採擇又詢於

知者及得好事者共成之待以歲月或有可就之理蓋此等書非一人之家盡備雖知有藏者無力可得又編寫非三五人之工可了所謂非公居位下者可集也如唐鄭餘慶四蕃十道志元和郡國志祇是官司文字甚爲可採某居長安已二十年關中自周秦漢晉南北分裂後魏後周隋唐已來事迹諸家所紀百不載一二嘗與親舊於前人碑刻詩賦小說間見其遺事因暇遊覽方見其實時亦得聞潛德幽隱之高行名卿賢臣之事

業明君聖王之美蹟今書史不傳徒慨然也某再拜
此書若欲其山川人物風俗物產郡邑興廢諸事一一
盡載及今古小說詩賦碑刻故事遺迹皆詳備須數千
卷方能了此非一人之工所能集若有同志人多共成
雖未一一全備猶勝已前者又有一事凡數說者且皆
存之

回王漕書

某啓梁洋及其東西乃岐雍之南屏舊有驛路自岐雍

可以直出而至昔曹孟德伐蜀先取漢中不能守而歸
孔明欲圖中原亦自漢中出師葢壤地相錯也當秦惠
王時先取漢而入蜀後光武使吳漢伐公孫述魏司馬
宣王使鄧艾取劉禪晉穆帝使朱齡石伐譙縱梁武帝
使鄧元起伐劉季述周太祖使尉遲迥平蕭紀隋文帝
使梁睿平王謙唐憲宗命高崇文平劉闢自秦至唐元
和九次伐蜀四爲水軍泝江而上秦與鄧艾尉遲迥梁
睿高崇文皆在斜谷及駱谷出師南討德宗自奉天趨

興元亦從斜谷去五代後唐莊宗取王衍本朝取孟昶
亦自此路入蜀今商販亦自長安之南子午谷直趨洋
州自洋南至達州若兩路漕司差官會議於境上畫圖
以閱舊迹可見但山路須有登陟往日曾爲驛程今雖
廢壞興工想亦不難矣惟裁度某啓上

與王漕欽臣書

某再拜蒙問驪山華清名宮之意此因左思賦有溫泉
必湧而自浪華清蕩邪而却老又後周王褒作溫泉碑

用左思魏都賦語有華清駐老之辭唐明皇每歲多幸驪山又其初甚有清靜好道長生之意唐人必因此以命宮名故宮中之殿名之曰長生殿所養鹿號曰長生鹿後人以鹿居山乃祿山之讖長生殿基今尚存王褒碑某少年曾見之後不復見全本候得暇記錄上呈

又

某蒙問王褒溫泉碑今錄所記者上呈原夫二儀開闢雷風以之通響五材運行水火因而並用炎上作苦既

麗純陽之德潤下作鹹且協凝陰之度至於遷陵熟溪
沉魚沸浪炎洲烘地火鼠含煙火井飛泉垂天遠扇焦
原涌水衝浪迸集甘泉浴日跳波邁椒丘之野湯谷揚
濤激水疾龍門之箭故以地伏流黃神泉愈疾銘曰挺
此溫谷驪山之陰白礬上徹丹砂下沉華清駐老飛流
瑩心谷神不死川德愈深其脫謬不能知也

又

某承問王巖碑乃耀州美原縣學碑也王巖唐美原縣令其

碑書撰皆巖自為碑今尚在歐陽永叔亦取之不知在耀邑

回汪衍承議書

某啓昨知出往河外往回計須月餘故未敢馳問今聞
還旆暑途登涉德履何如接事必盡得要領素未諳者
無不駭愕知底裏則發笑而憤矣承借徐季海書墨跡
新秋雨霽展玩累日遂忘飲食能生人喜氣如此季海
晚年書也季海書碑刻甚多若其父嶠之墓碑董孝子
碣開河碑龍潭寺般若寺三洞弟子鰻井詩嵩山題經

不空三藏碑此石刻尋常屢見粗能記者其書法不少
時學其父書筆畫方勁多露芒角晚乃收拾藏鋒歷觀
前人能書者亦多如此非惟所用之筆時有不同亦別
有新意顏魯公爲醴泉尉時書畫纖勁清麗後爲武部
員外郎書千福寺碑方實茂密晚節骨力遒勁方正嚴重
季海少時題千佛寺碑額作八分書筆勢圓媚可愛老
而筆力雄彊肉中有骨司空表聖云如怒猊抉石渴驥
奔泉信佳論也祿山作亂顏魯公與季海同在河朔舉

兵相應以禦祿山晚爲嶺南節度使唐史所載甚畧蒙諭跋其後漫識之不宣某再拜

回蔡太丞書

某啓近者隸從取道得遂觀止殊慰夙昔景仰之勤比違方深馳向忽辱翰承已奉朝請動止清福感慰感慰蒙問趙襄子智伯事乃太原故城是也當日分晉水爲二流一引而灌城今遺蹟不可究公孫杵臼程嬰墓昔年畧曾究之在邯鄲縣西一十二里有趙簡子墓又其

西有石子岡二人墓皆在其側趙簡子墓如硯自古傳
爲硯子冢石虎曾令人發之初得炭深一丈得木板次
有泉水作絞車以皮囊汲之一月不絕而止今亦不見
其穿鑿處杵臼與嬰實存趙氏當今宜奉廟食聞此向
已有人曾言不知其時曾行否今或下絳州亦訪之恐
非是須是在趙可得其實不宣某再拜

答晉城令張翼書

某辱問赤伏事所出昔年見琴操魯哀公十四年西狩

薪者獲麟擊之傷其左足將以示孔子孔子見俛而泣
抱麟而言曰爾孰爲來哉反袂拭面仰視其人龍顏日
角孔子奉麟之口久而吐三卷圖一曰赤伏劉季興爲
主二曰周滅夫子將終三曰爲漢制造孝經夫子謂子
夏曰新主將出如獲麟者至漢將興高祖斬白蛇素靈
夜哭曰白帝滅赤帝興自古推歷數者言五行之運以
相生者繼之周以木德王天下以秦爲閏不當繼周木
生火漢當承周漢爲火德故曰赤伏焉此出於緯書也

六經謂之經經常道也經必有緯緯言其變也多言災
祥世數聖人不敢以此爲法恐失先王之大道也識者
驗也言有其兆必有其驗桓譚不讀讖非不知讖欲其
君知道也讖書不曾見於書史中畧見之梵書中亦有
知之曰西天有修多羅讖言釋氏之教興廢則讖書其
來遠矣某啓上

與范鉞朝請書

某承借觀唐人畫邢和璞房琯及西河篆字此事某常

於小說見之然與西河所書小異小說所載邢事甚衆
謂是得道之士能役鬼神向觀潁陽隱書粗見其術今
此畫言邢知房次律乃智永禪師後身鑿地取前世所藏
之書使房廓然發悟亦甚異也畫筆法意象不甚高古
而近世畫者不能及謹令還納惟檢入

回周沚法曹書

承諭滕王閣記此不足稱也唐初文章沿江左餘風氣
格卑弱殊無古意庾信作馬射賦云落霞與芝蓋齊飛

楊柳共春旗一色後人愛而效之武德二年巢刺王建舍利塔於懷州作記云白雲與嶺松張蓋明月共巖桂分叢如此者甚多當時好尚勃徂於習俗故一時稱之凡爲文須是理勝若庾肩吾與其子信徐摛與其子陵皆有辭筆江左末盛稱之此皆不足法舊史言爲文之罪人故唐之後來無人作此等語

回知隰州劉季孫左藏書

某再拜承示佳什詞意爽拔不勝降歎樂天筆迹往年

於長安蕭隨中舍處見之與此少異恐起草不甚用意
然其放逸自在尤可追想其風槩方牛李相傾朝廷道
路皆不敢以目而樂天出入於二黨之間在彼無惡在
此無數非賢者安能如是觀其書論其人此筆迹尤可
貴也王摩詰畫竹亦嘗見於岐下僧舍此筆尤老而勁
又極自然非尋常所能到得觀甚幸謹還納惟檢入
承問李侯所藏王子敬帖亦常見之此乃唐人臨搨者
極易辨一軸凡四帖分寄三人而紙用兩幅安有帖寄

兩人紙用一幅乎始收者不能辨印記題跋甚秘後來
但見貴人所寶故歷代傳以爲真也二王書迹東晉之
盛上下已皆愛重又父子皆不惜筆畫宜其傳者甚多
但累經喪亂今遂無有昔後周承聖末遣于謹襲江陵
梁元帝將降乃聚古今圖書十四萬卷并大小二王書
迹命後閣舍人高善寶焚之歷代所藏盡爲灰燼唐太
宗好書人間所藏求之殆盡藏於內府高宗以後或賜
予或盜竊又散落人間宗楚客中宗時爲中書令奏事

承恩乃乞大小二王真迹勅賜二十卷大小各十軸楚客裝作屏風王涯作相專求法書盡以金帛官職致之涯既被害人但取裝飾金玉書畫皆焚棄經五代故無子遺今書學不競用筆之法絕而不傳雖臨搨之本舉世畧無一二亦使人時爲慨然也

回盧教授書

某啓兩辱惠書不勝感荷春寒伏惟優游庠序體候清和良深慰忭承稱譽過當甚非所望某管見謏聞幼少

勉於記誦蓋欲博極前言往行既長究觀前人之言行
或乘其時或因其人或應其當日之事至孔子之與門
弟子應答及其餘來問者率是如此乃事之一端未盡
其道之大槩學者當深造求得其原得其原則左右從
容無不可矣此某之所學未敢自謂已至於此也子貢
曰夫子之文章可得而聞也性與天道不可得而聞也
此乃知子貢不妄自謂有得也子曰吾道一以貫之此
聖人言道大體也曾子以所見而言曰忠恕而已此未

盡孔子之言也夫道無不在也不可增也不可損也不可撓也不可澄也欲外之而不能外也欲去之而不可去也欲強親之亦非也欲強疎之亦非也人日用而不知也不求其本尋文摘句是入海算沙也心之所自得雖因聞見若脫然自悟聞見乃筌蹄矣請思之不宣某再拜

又

某頓首啓淳辱華翰仰服眷勤伏承履茲春和靜作佳

福感慰叵量某局事少暇不得安靜勉力應接皆不得
已亦須時役思慮但夙夜且爲之推遣蒙諭著書此非
某所能亦非某所敢議也聖人之道不傳也久矣後之
爲書失其本根而求其枝葉就其枝葉又爲蔓辭不知
言之愈多去道愈遠又務漁獵近似之語欲自成一家
此皆中無所有苟求虛名也是皆君子之罪人也學者
求爲君子矣前人之言切於事者無如論語與孟子不
能於此二書窮講其趣安知入德之路捨此而欲求新

奇之言非所謂善學也今人之於善未嘗講究又未嘗分明作得一事至於沒齒不知果如何謂之善但隨人南北茫茫然醉生夢死孟子言行之而不著習矣而不察終身由之而不知其道正謂是也某此意居常不敢妄言於人恐取尤悔累承見問故畧拜聞某頌首

回謝教授書

承問樂昔戰國時所謂古樂已非盡是先王之樂自周衰樂工分散適秦漢齊楚古樂安得全在瑩篴有小說

謂師延作始於桑間濮上人傳之師涓嘗爲晉文公鼓
之後鄭衛分其地故以鄭衛之音爲淫聲又風俗通曰
漢武帝禮泰山太一后土令樂人侯調依琴作坎侯言
其音坎坎應節侯者以其姓也故亦曰坎侯笛風俗通
曰武帝時丘中所作也笛滌也滌除邪穢也長尺有四
寸七孔後有羌笛馬融賦之笛者古之簫也後世損益
而異也今之長簫乃洞簫也非簫韶之簫也霓裳開元
時曲劉禹錫詩云三鄉陌上望仙山歸作霓裳羽衣曲

又唐人詩曰聽松聽水作霓裳又小說明皇與術士葉靜能遊月宮歸作霓裳舞此某幼小聞其說如此

答党綸教授書

承示新論詞氣甚壯足以發人之意但魯肅非可以擬武侯孫權據有江東事勢已成但未僭位魯肅使之僭耳劉玄德無一旅之衆武侯與之開國定霸甚相遠也二人之事見於本志可檢見之武侯戮馬謖蔣琬非之後人從而議焉當時馬謖若違武侯節度能爲成功武

侯智計不至則武侯可議既違果致街亭之敗安得不
行法令若取蔣琬之言貶武侯之大體甚未可也

與嚴灝司理書

某啓辱簡欣承春和體中佳粹權文公集久留甚愧鼎
鏡恐非舊物製作殊無雅思唐時午日揚州江心鑄鏡
供進又玄宗千秋節外進方鏡某家昔收得一面乃是
方鏡背鼻有篆文五日字面徑八寸重五十兩與此甚
異鼎銘云開耀四年此非也高宗永隆二年改開耀開

耀二年二月已改永淳矣今並還納請檢入盛露囊子
秋節咸里皆進華山記云弘農鄧紹八月曉入華山見
童子執五綵囊盛柏露飲之又荆楚風土記以五綵結
眼明囊相傳赤松子以囊盛柏露飲之而長生皆八月
中事爲之乃祝壽之意某啓上

欽定四庫全書

滴水集卷四

宋 李復 撰

書牘

與運判朱勅正言書

某再拜違去聲光半月不勝瞻仰即日不審尊候何似
某到太原留三日畢憲議役法竟無果決恐錢運留滯
徑且北行根究得臨汾洪洞趙城三邑未到苛嵐已牒
本軍差官南去催促今日領牒命河外三州并保德軍

令用三分見錢七分鈔糴買此事某未敢便依稟行報
四處緣本路糴買自某初到蒙差措置只令用鈔以本
路自近裏般運見錢鐵錢脚重須只般一色銅錢嘗以
三歲計之本路諸色所入銅錢無幾不准近裏支用不
足又般運脚費數多支與客人亦決不肯顧脚却般回
並須流入二敵無復更還雖嚴刑不能止也昨胡吏部
創支一色見錢胡漕鼎來此雖不知本末有意希望欲
得速成糴買見錢客人亦患不能般回只是於專料等

處行用今獻說者乃與糴官專料爲地此事灼然望少待之蓋繫一路久遠利害如將來舉事糴買軍儲未就某乞獨坐受責候到新秦別上狀初秋伏冀爲國自重
回舒之翰承議書

某再拜睽邈之久瞻嚮徒勤忽領榮翰伏審旅食京師動止佳福慰戢沛集鹽事前曾畧具其槩拜聞此事於官中所繫甚輕於一路細民所繫甚重永利兩鹽并一路歲額所入纔十餘萬緡其中官本四分馬城池出賣

不行已四年餘自陳子堅變法後來州縣追捕刑獄連逮禁繫無虛日根究過致及巡邏人死於獄中者歲近百人馬城池鹽是陳子堅與忻守燕復將解鹽封進欺罔求賞將本池苦鹽抑配人戶出賣本司已奏乞罷燕復及乞禁抑配立法范謝二漕各執偏見不敢變前日已奏之議此若一向官賣須有抑配若只令客販客或不來無可督責昨日聞報朝廷以此事暫使本路幸且枉駕乘謝在此共議二人皆已求去若遂其請後來者

愈不知本末春寒惟冀保重

與運使張少卿書

某再拜運使少卿違德踰旬不勝瞻仰即日伏惟動止
萬福某自汾入石相度應副石州歲計自來支移限以
地里故汾州東諸縣祇遠一二十里皆不到石州石州
以此納數甚少又以對岸延州諸寨糴價大段太高牽
引客人多過河西今石窟驛去石州一驛東至汾州甚
近汾東諸縣皆以彼送納本處自有監驛兼煙火自可

照管但舊倉甚小須當添修汾石皆產木植令兩縣同
修不日可畢候二稅納足或團廂軍般運或今番就請
即石州便足却將石州糴本分與葭蘆及克胡此最甚
便非惟今日亦久遠可行今并圖子拜呈不知大旆何
日比按欲就太原拜見餘乞以時自重不宣某再拜

答張尉書

承示新詩仰服留心不倦人之爲文與詩最見精神若
品格已定辭氣卑凡不能更有損益此甚不佳也猶肆

筵犒設大排二十四味件件皆有而無可下筯去處若
雖未成就其中自有佳語是猶雛鶴雛雛戛然一鳴知
其爲雲霄外物又意有數十言不能盡只用故事三兩
字可總而盡之此又貴乎博聞也若塵言常能盡去而
立意造語務求高古清新此又非尋常所到也茲豈一
端而已哉嘗曰讀其言知其人幸無求小成也某上

答李成季書

河源圖昨據降酋所說畫之亦恐未然唐貞觀年命李

靖等攻吐谷渾侯君集與江夏王道宗趣南路登漢哭
山過烏海北望積石山觀河源之所出後長慶二年劉
全鼎往西蕃會盟往來渡黃河上流在洪濟西南二千
餘里其水極淺狹春可涉其南三百餘里有三山形如
鍬河源在其間水甚清冷經歷水會多成大河色遂赤
舊史所載如此今降酋只青唐河南人恐未是的某又
啓

答彭元發書

某啓辱書累幅極荷勤至非見愛之厚何以及此人之仕宦皆欲速進皆欲得美官入仕之徑以進士爲優其賢良方正直諫等科比之進士又高中其科者人尤貴之其進必速美官刻日可至歆羨者多願爲者衆也然而知義守分稍自愛者未嘗往求而與選焉某幼時所學聲律偶儷之文早年十六歲就太學取解是時試詩誤中以故不赴禮部試遂不復以科舉爲意但當博考前言往行篤於爲善而已矣後十餘年迫於生計學今

日程文一試而忝預名第斗祿足以自養益堅向日讀書爲善之志此外妄求非惟不敢輕萌亦自然無毫髮意蓋賢科之目其體甚高安敢自當而又有著令須從官共薦進論被召乃試此豈某所能爲蒙諭不勝愧忤
某啓上

又

某又承諭天下事未有不求而得欲某以書干當路顯者某屢默觀投書於高位有置而不觀者有觀而不終

者有粗觀而明讀者有讀而不識句讀者某每不罪其
受書之人罪其獻者不自重而妄動也元發試取所謂
賢科者程文與今之進士程文考之相去幾何皆浮詞
耳其所獻書爲之大言露才揚已觀之可愧其進卷與
程文何異洎中其科得美官曾有何補乃給朝廷之一
銜耳某向氣力不彊別無可以營餬口遂從科舉誤爾
中第今思裹飯俯首列坐庭下辱莫甚焉而使又爲之
誠不能也若某可以耕於寬間之野釣於寂寞之濱而

足爲生豈祿仕云哉某又啓

答耀州諸進士書

某昨得郡符召詣郡議事既至適會二使者在郡中使者與太守誤以某治邑爲能欲與華原史令對易庶令兼教官職事某聞之日得與諸君講學不勝幸甚然徐思之史令非次對易異日調官有礙此外不敢默然無言也故託以他事辭之今尚未報前日承州符先令兼教授除攝於外舊無此例已辭不獲今辱長牋委細見

喻仰服意好益愧不敢某昔遊場屋程文偶中有司之意此特一時之幸耳非所謂學也諸君切於祿仕須學時文其力行深造不可不勉某非晚以役法會議須再到郡中餘可面究未聞冀愛重某再拜

又答耀州諸進士書

某辱問科舉程文之體今之印行爲有司考之在高等者其文乃程文之體也雖然此豈有定體先須講求義理的當中心渙然乃可作文義理若非雖洪筆麗藻亦

非矣又爲丈須去塵言用事實貴整齊意分明此其大畧也諸君於此想盡善矣勉應佳問某再啓

答趙子彊書

某啓辱書承涉冬講學不倦履尚多福甚慰甚慰所寄新文累篇足見用心但論一人之事須知其人才識本末及其行事乃可爲說若唐高祖雖是創業之君比之漢高祖先武殆遠初爲汾陽宮監裴寂誅而誘之遂納其宮人既納太宗之謀給而聚烏合之衆至霍邑阻雨

乃欲退歸將至蒲津先遣建成元吉劉文靜據永豐倉
守潼關又太宗自龍門縣渡河入韓城來渭北徇衆方
能中間渡河既受隋禪以宋金剛尚有晉絳乃欲棄河
東以河爲界京邑自周秦以來在雍岐吐蕃犯邊乃欲
遷於山南受建成元吉之譖而疑太宗以此數事觀之
其人可見矣凡作論若只以一事言之皆不盡古之聖
帝明王治身治家治國三綱五常人倫之道而已唐之
父子君臣夫婦兄弟之道皆廢禮義上下無所措其享

國至於二百八十餘年亦幸矣禮義立則女謁宦官藩鎮安得至於禍敗歟某啓

又答趙子彊書

某承諭揚子雲近世學者謂之聖人此論甚未當若惟寂惟冥自投閣爰清爰靜作符命皆舊史之妄班固去雄未遠其傳與贊皆謂之妄今去雄千年緣何而別爲之辭史若不可信雄又言未有如漢公之懿此又何如有道則仕劇秦美新合於理義否按雄家牒雄以天鳳

五年卒葬於安陵坂上當時所厚如沛郡桓君山平陵
茹子禮弟子鉅鹿侯芭共爲治喪侯芭作墳號曰立塚
已湮滅不可見某又上

又回趙子彊書

辱書王子年拾遺等事子年名嘉乃苻堅姚萇時人隱
於東陽谷鑿穴而居弟子受業者百餘人皆穴處李龍
兵亂棄其徒衆遷於倒獸山今在華州渭南縣一名互
象山後不知所終其書多荒怪不可考乃莊周所謂齊

諧者也伯樂傳記所見事其說不一王褒聖主賢臣頌云及至駕闔駟乘旦王良執靶韓哀附輿張晏注云王良郵無恤字伯樂顏師古參驗左氏傳及國語孟子郵無恤郵良劉無止王良總一人也楚辭驥躊躇於敝輦遇孫陽而得代王逸云孫陽伯樂姓名也或云伯樂秦穆公時人考其年代不相當張湛云良字伯樂亦非也此皆前人所言如此未得考證不知更曾於他書見否某上

又答趙子彊書

孔子未嘗著書於詩書但有去取春秋因魯史而修之
易道隱秘畧發明之亦未盡露也孟子與衆人講論答
問當時集錄而成書亦非自著也孔子之所自得者不
可得而知故子貢言言性與天道不可得而聞孟子之
所自得自嘗言之矣曰盡心知性存心養性又曰我知
言我善養吾浩然之氣又曰君子深造之以道欲其自
得之也聖人之自得難以輕語諸人豈若尋常之好作

詞語者君子之於言也達其理而已故孔子曰予欲無
言孟子亦曰予豈好辯哉予不得已也是皆非尚辭也
若揚雄之於道自無所得也作法言其問者非所疑也
其答者非所不知也作太玄以太初歷之法分四時二
十四氣二十八舍之度太陽所行之數文之以言擬乎
易特好名而爲之也使雄若知道法言與太玄皆不作
矣夫聖人之道至於神極矣揚雄之法言曰神在所潛
潛天而天潛地而地天地神明之所不測心之潛也猶

將測之況於人乎況於事倫乎此雄以思索爲神其意
乃謂太玄也觀太玄於易果有得乎易曰神者妙萬物
而爲言也孟子曰聖而不可知之之謂神至於聖而又
進矣然後可以知神雄果進於聖乎艱言苦思贊爲此
書豈非好名者乎遽中草畧奉啓言無詮次幸照察某
再啓

答辛祖禹書

承諭軌策此乃天地陰陽自然之數不可以臆說乾陽

也天也坤陰也地也陰陽之數乃天地之數也故曰軌從策起策以軌受庖犧始畫八卦後以八卦自相乘得六十四卦又以六爻相乘得三百八十四爻陰陽分之各得一百九十二而氣數不在焉氣數自有損益也陽主進倍其氣而益之陰主退倍其氣而減之陽爻除氣數二十四外餘一百六十八以策數而得七七爲少陽以氣數倍爲四十八益之得二百一十六以策數而得九九爲老陽老陽者動而觀其變也陽進故七而之九

九爲老故變也陰爻以策數而得八爲少陰倍氣數四十八而減之得一百四十四得六而爲老陰六爲老故變也陰退故八而之六也凡求爻之策陰陽各四因之陽九以四因之得三十六少陽七以四因之得二十八陰六以四因之得二十四少陰八以四因之得三十二動靜之理得然後可以求擬議成變化也方有河外之報遽中不暇盡其餘承問卦爻策數此當各考其卦爻之陰陽自可見矣凡卦老陰爻有幾以二十四乘之老陰之

策數也少陰有幾以三十二乘之得少陰策數以老陰加少陰即得陰爻之策數也卦老陽爻有幾以三十六乘之得老陽之策數少陽爻有幾以二十八乘之得少陽策數以少陽加老陽即得陽爻之策數也陰陽合之得其卦之策數也若卦之軌數即考其陽爻有幾以老陽三十六少陽二十八共六十四乘其數所得而倍之得陽爻軌也考其卦陰爻有幾以老陰二十四少陰三十二共五十六乘其數所得倍之得陰爻軌也以陽軌

加陰軌所共得之數乃卦數之軌也承問陰陽之策總數各從卦爻陰陽所得之數而乘之自可見矣謂如陽爻一百九十二九乘四因得六千九百一十二六乘四因得四千六百八故通卦驗曰陰陽總一萬一千五百二十也若軌總數則置陽爻一百九十二六十四乘得一萬二千二百八十八倍之得二萬四千五百七十六置陰爻一百九十二五十六乘得一萬七百五十二倍之得二萬一千五百故曰陰陽衍而四萬六千八十也

自八卦成列引而伸之數在其中矣此乃軌之大數也
若欲遂知其來物則當視其時而進數滿而去得其所
餘之數考其所在自可見矣 辱見論此乃古人所用
以爲占者也如左氏所載京房焦贛管輅郭璞輩皆用
之不專以軌策之數以求陰陽老少兼通別卦世應人
又以年月氣候日時而定也謂如世屬陽卦而世得陰
爻則爲老陰世屬陰卦而世得陽爻則爲老陽世屬陰
卦而得陰爻則爲少陰世屬陽卦而得陽爻則爲少陽

又如陽月陰爻陰月陽爻皆謂之老當其月者皆謂之少如陰居陽爻陽居陰爻亦皆謂之老凡此老少不待策之九六而變也各當其位皆謂之少矣以月之陰陽日之陰陽時之陰陽卦與爻之陰陽參而考之兼之以氣候而用之此並自有法

答辛祖德書

辱問卦爻御時曰八卦相乘爲六十四爻三百八十有四以坎離震兌以御時以三百六十爻以御日也坎居

北方子位陽之始十一月卦也冬至陽始生故坎始於冬至震居東方卯位陽之出二月也故震始於春分離居南方午位陰之始五月也故離始於夏至兌居西方酉位陰之成八月也故兌始於秋分餘每一卦統二日間以減沒則七日而成卦蓋減沒者數之餘卦所不居也舊說以此法出於焦贛贛以授京房非也乃焦贛專用之法耳易之復卦曰七日來復此聖人之言也冬至日中孚初爻用事後七日復卦用事則爻以御日其來

尚矣豈特漢之焦贛乎太極元氣函三爲一故三爻而
成卦萬物皆函三數皆自然之數也卦雖各有體其氣
互相交通八卦二十四爻陰陽各一十二其氣旁通此
爻之取象出於此也易曰輦用黄牛之革此坤之氣也
又曰龍戰于野其血玄黃此乾之氣也 問中孚曰乘
木舟虛也渙曰乘木有功也晉利涉大川木道乃行何也
曰此皆巽在上也巽木也風也順也中孚巽上而兌下
兌爲澤木在澤上乘風而順舟濟之象也中孚六三六

四皆陰爻中虛有剡木之象故曰乘木舟虛也渙巽上而
坎下木居水而風順之故曰乘木有功也益巽上而震
下震雖主動非若浮於水故曰利涉大川木道乃行繫
辭曰剡木爲舟剡木爲楫舟楫之利以濟不通蓋取諸
渙象以此也易曰制器者尚乎象夫斷木爲棋剡革爲
鞠亦皆有法況聖人之制器乎故曰知器械舟車禮由
已也 問制器者必取其象若日中爲市致天下之民
聚天下之貨交易而退各得其所此非制器也而取於

噬嗑何象也曰正取於象也噬嗑離上而震下離南方之卦在上日中也市爲虛離之象也震東方之卦萬物所由出也震爲足爲動離者萬物相見之卦也物出而相見所謂致天下之民聚天下之貨也頤中有物得其噬是謂各得其所也雖然神農所取如此易之大象則曰雷電噬嗑先王以明罰敕法所取象又如此易豈一端而已哉 問睽曰二女同居而其志不同革曰二女同居而其志不相得何也曰睽離上而兌下二女同居

也離火炎上而自居其上澤水趨下而已居其下水火異趣故其志不同也革兌上而離下亦二女同居也水本趨下而居於上火本炎上而居於下水欲趨而下火欲動而上水火相遇而爭故曰不相得也

答曹鑒秀才書

承問卦先後之序此儒者論之序卦詳矣蓋序卦之說皆人事也聖人爲世立法當只以人事言若其異說與秘卦與繫辭未嘗顯言苟得聞其說亦於經中可見其

端昔有鄭明微江南人數見於京師嘗談其一二詰之甚秘熟察之乃用此以修鍊御氣者又曰今八卦之位乃周人所置之位卦豈一定其位而不易哉移易其位方可窮萬世知萬物所以謂之易也易之爲用大矣神矣豈一端已哉卦以陰陽相配其理未易說至於歷之二十四氣七十二候皆以陰陽是猶一晝則有一夜也萬物芸芸皆出於陰陽豈有能外陰陽者歟 問負且乘致寇至解之六三也乘九二負九四不應上六以招吝

之謂也而繫辭曰負者小人之事乘者君子之器以小
人乘君子之器致寇至又公用射隼于高墉之上出而
有獲者解之上六也墉非隼之所止也六三處下卦之
上高墉也履不當位猶隼失所止也上六居動之極除
六三之邪佞而無不利故有獲也而繫辭曰弓矢者器
也射之者人也君子藏器於身待時而動是以動而不
括出而有獲此繫辭與二爻之義不同何也曰此所謂
左右逢其原也若繪事後素曰禮後乎孔子謂可與言

詩亦謂能推廣其意孔子嘗曰六言六蔽又曰學則不固若蔽固則滯而有所廢繫辭推廣卦爻之義周流無不可此故曰仁者見之謂之仁智者見之謂之智也昔鄭公子曼滿求爲卿王子伯廖曰無德而貪其在易豐之象也夫豐明盛之時上六以陰居陰幽闇之甚故有豐其蔀之象伯廖引以罪曼滿之貪斯時亦能推易之意又况聖人之於易乎夫非止於易也於他經中斷章取義亦多矣如左傳孝經多引詩句證其事者是也

問復則不妄曰歸根曰靜靜曰復命此復也復命曰常
知常曰明不知常妄作凶此不妄也 問乾卦其爻何
以皆九坤卦何以皆六曰易曰參天兩地而倚數一三
五皆天數也二四皆地數也一三五乃九乾天也故倚
天之數所謂參天也二四乃六坤地也故倚地之數所
謂兩地也易之數皆以四營之九而四營之故乾之策
三十六六爻二百一十有六六而四營之故坤之策二
十有四六爻一百四十有四陰陽之策合而爲三百六

十以當暮之日也六十四卦共三百八十四爻陽爻一百九十二每爻三十六共六千九百一十二陰爻一百九十二每爻二十四計四千六百八陰陽合而爲萬有一千五百二十此所謂萬物之數也又以陽爻一百九十二每爻九數計一千七百二十八陰爻一百九十二每爻六數計一千一百五十二陰陽合而爲二千八百八十以四營之亦一萬一千五百二十此又是一法也問伏羲始畫八卦文王演之止於六十四卦何也曰

八卦非伏羲自創意畫之乃太極生兩儀兩儀生四象
四象生之伏羲隨四象所生而畫之耳既生八卦無所
不具故曰八卦成列而象在其中矣以八卦互相重之
八八相因所以止於六十四卦也非文王自出已意而
演之也考之繫辭垂裳而天下治取諸乾坤舟楫之利取諸渙
服牛乘馬取諸隨白杵之利取諸小過弧矢之利取諸睽
宮室取諸大壯塋以棺槨取諸大過重門擊柝取諸豫
書契取諸夬此盡在文王之前六十四卦知非始於文

王也孔子言作易者知憂患其文王與紂之事蓋文王
之於易專取其濟憂患之道非謂重卦也今若曰如乾
之初一變而爲姤二變而爲遯三變而爲否四變而爲
觀五變而爲剝六變而爲晉七變而爲大有八變歸爲
乾此乃易消息歸遊之說若六爻自下變而上復自上
變而下不止於八變亦不止於六十四卦又下三爻始
則每爻一變終則三爻共爲一變亦無是理且文王未
演以前止有八卦卦各止三爻安得有六爻而成八變

乎今且以乾卦一卦言之以乾重之乃純乾以坎重之爲需以艮重之爲大畜以震重之爲大壯以巽重之乃小畜以離重之爲大有以坤重之爲泰以兌重之爲夬此所謂因而重之引而伸之也餘皆類此所謂觸類而長之也故繫辭曰八卦相錯也 問乾卦曰聖人之德業也於舜見之矣 問臨至八月有凶曰臨與遯對謂之八月者此以周言也 問象何以言材曰彖者總論一卦之義也一卦之義在一爻任一卦之事故曰材也

若比卦之九五豫卦之九四之類皆一陽爻爲衆陰之主也若同人之六二大有之六五之類皆一陰爻爲衆陽之主也若一爻不能盡則二體以明之若噬嗑曰雷電合而章豐卦曰明以動之類是也然則陰可以主乎曰陰雖賤也寡者衆之所宗也天下之動貞夫一者也易曰三人行則損一人一人行則得其友言致一也故曰觀乎象辭思過半矣 問繫辭言制宮室蓋取諸大壯之象大壯之象乃曰君子非禮勿履何也曰大壯震

上而乾下震木也上棟之象乾爲園爲闢戶下宇之象也夫物壯則老是惟不大不大則已既大而壯物莫與之以禮制行物莫勝也乃能全其壯也本卦言其制行繫辭言制器故曰易有聖人之道四焉 問易之衆爻何其多變也曰六爻相雜惟其時物也剛柔雜居而以情變也是故愛惡之相攻而吉凶生遠近之相取而悔吝生情僞相感而利害生凡爻之情近而不相得則凶或害之遠非其應而應之不安其分也皆悔且吝此所

以多變也 或問師出以律何也曰律者紀律紀律乃
軍政也出師其政不立無有不敗苟或幸勝不可以爲
常後必取敗也今之說者乃曰吹律以聽軍聲此出於
國語武王伐紂及司馬効勝負之說也夫審音以卜吉
凶則有之矣遂以軍師制事立法皆有軌則猶樂之有
律是謂律法若軍政無法何以行師其餘皆不可以爲
治 問易之乾坤爻辭曰乾陽也君子也欲其進也剛
之極則亦有悔坤陰也小人也不可長也故其初已有

堅冰之戒焉

問易言智崇禮卑曰智能達乎形之上

禮惟行乎形之下者且天一生水地二生火烹飪之道
水在上而火在下也 問易曰太極生兩儀兩儀生四

象四象生八卦又曰古者包犧氏之王天下也仰則觀
象於天俯則觀法於地觀鳥獸之文與地之宜近取諸
身遠取諸物於是始作八卦又曰天地變化聖人效之
天垂象見吉凶聖人象之河出圖洛出書聖人則之是
三者皆言作卦之因也何以不同曰河圖所載乃四象

八卦也仰觀俯察遠近取之乃八卦所包之象也說卦
備言之矣 問大衍之數太玄之數曰天地之數五十
有五天陽也其數奇故二十有五地陰也其數偶故三
十也五位相得而有合五十有五然大衍之數五十易
曰天下之動貞夫一一者數之宗也自一而爲七七而
七因之所以其用四十有九虛其一也

